



数据加载失败，请稍后重试！

〔明〕

秦昌遇

幼科金針

歷代中醫珍本集成

曹序

治病難。而治幼兒之病尤難。書康誥曰。如保赤子。大學釋之曰。以誠求之。雖不中。不遠矣。夫既曰不遠。則固未能盡中。母之於子。求之至誠。尙不能必中於赤子之嗜好。况醫者治病。望氣切脉。於須臾之間。問之而不能自言。言者或有毫釐千里之差。苟非沈潜古醫書。確有權衡。臨診閱歷。源悉病情。仁心愷惻。體念入微。欲其用藥確當無誤。難矣。松江吳君果超。予中表婿。以儒術通醫理。爲人治病。全活甚多。一日在友人處。見秦氏幼科金針。惜其孤本。行世無多。擬重刊之。問序於予。予數十年來。承遠近過信。所見病者。疾痛慘怛之狀。千變萬態。不可勝數。而舉家老幼危急憂懼之情。實令人心惻不已。卽以幼科論。嗟泣呻吟。痛疾之意。莫可形容。質弱病重。納藥無多。見效至難。或老年得子。枯楊生稊。一

而難再。或累世單傳。舉家血脉。在此塊肉。其父母涕泣待命。呼號求援。當此之時。下筆躊躇。每於萬難措施之中。求一綫之生機。雖萬全不敢必。而吾心庶幾無憾。昔孟子有言。今人乍見孺子。將入於井。皆有怵惕惻隱之心。病之危。無異入井。而醫之難。百倍於援溺。夫安得不慎乎。父母愛子之心。無所不至。人情所同。爲醫者。苟能視人之病。如己之病。視人之子。爲己之子。則其造福於斯人也。無窮。而天道好還。善氣所感。康強自壽。子孫蕃衍。理有必然。然苟非學有淵源。多讀古醫書。多得經驗方。而平心實事。以求其是。亦安能以仁心行仁術耶。秦氏書凡六種。皆精詳確當。實於醫學有裨。向鈔刊本。我家故有舊鈔全帙。兵燹後失之。今果超得善本。不自珍秘。以昭同志。予嘉其存心之仁。且公敬書所見題之。

癸亥正月古吳曹元恆智涵氏書於蘭蕙雪白之齋

錢序

古之人有言。醫者意也。運用之妙。在於一心。法於陰陽。和於術數。神明變化。意想所至。適合病情。所謂從心所欲。不踰規矩者。斯醫也可。司一方之命。能起九死之生。其道不綦重歟。然醫學有淺深。卽醫工分上下。望問聞切。同此視聽。失之毫釐。謬以千里。醫之內分諸科。莫不皆然。而幼科爲尤甚。蓋幼科世稱啞科。遇有疾病。不能自言痛苦。卽言之亦恟恍而莫察其準的。所以診治較難於諸科也。善醫者胸羅秘籍。家富奇書。斯症無遁情。治病百不失一矣。辛酉夏兒子潤琳年甫二歲。有奇病。暑濕甚劇。延吳君果超診治。危而復安。余與吳君本屬世交。因之益加親密。輒與談醫理。知其家學淵源。寢饋醫學者二十有餘年。家藏古書甚富。偶見手鈔郡人秦景明先生幼科金鍼一書。云。借錄於亭林戴氏。

惜末缺四則。無從補錄。辨症精細。獲斷詳確。偶師其意。輒獲奇效。不敢自秘。擬付剞劂。以廣流傳。囑余爲序。深愧不文。於醫學又乏門徑。何敢妄議古籍。且秦氏書皆精詳確當。曹序已評之。是爲千秋定論。余可毋庸復贅矣。

金山錢銘銓選青序於雲間復園

秦景明先生遺事二則

松江府志藝術傳。明秦昌遇字景明。上海人。善醫。嘗行村落。見婦人漸米。謂其家人曰。婦痘且發。當不治。須激其怒。使毒發於肝部。乃使僕驟抱之。婦大怒。昌遇曰。可矣。痘發投藥而愈。有林某年方壯。昌遇視之曰。明年必病。三歲死。已而果然。年六十。豫告終期而卒。生平志趣高雅。董文敏嘗繪六逸圖。皆郡耆宿。景明年最少。與焉。著有大方幼科痘疹折衷行世。果超按幼科折衷附痘疹一書。予家藏有幼科鈔本。而缺痘疹一集。俟異日覓得全書。卽當付刊。至大方則未聞見也。

雲間許元仲三異筆談。載驚痘事。與府志同。又載秦技絕人。而性好博。一入局戲。則天子呼來不上船也。南翔有富室昆仲均卒。弟有一子。妯娌共育之。值患痘危。其母遣僕飛舟迎秦。限以晷刻。至則秦已入局。托以潮逆。興盡登舟。至翔入視。已成反關。不可爲矣。拂衣欲去。延賓者留入客室。則兒母已出一手握刀。

一手拉秦鬚曰。我飛棹來迎。其時痘點尙顯。汝若卽來。尙可爲也。汝託言潮逆。遲遲我行。復隱之。故汝實致之。今兒不能生。我亦不欲活。若亦不得活也。我刺若。卽自刺。不忍見兒之絕。差可剖心於長姒。持面於故夫耳。秦大窘。不敢致辯。但曰孽矣。婦復激之曰。君有仙名而不能療一兒。半身名譽。皆盜竊耳。秦曰。有一法。姑試之。愈則不任功也。乃令掘坑臥兒。以黃土徧擁兒身。惟露面目。煎藥水洒之。以席覆其上。婦鑰其門。偕坐共守之。至夜半。忽聞奇臭。秦躍然起曰。生矣。出兒視之。痘已復顯。皮敗肉腐。悉成通漿。不半月而全愈。

幼科金鍼一書爲亭林世醫戴氏所藏。世無刊本。亦尠人知。郡史小說均未載及。若無戴氏收藏。秦氏佳編湮不彰矣。余與戴氏爲醫世交。章甫君因余習兒醫。慨然借錄。余不敢自秘。校勘付印。用廣其傳。以誌君之惠書。

辛酉季冬金山吳中俊果超謹誌

幼科金鍼目錄

卷上

第一編	全胎	一
第二編	胎寒	二
第三編	胎熱	三
第四編	胎驚	四
第五編	胎風撮口	五
第六編	胎驚	七
第七編	盤腸內疝	九
第八編	夜啼	九
第九編	天癆	一二
第十編	胎口疳	一三

第十一編	乳癰	一四
第十二編	急驚	一五
第十三編	慢驚	一七
第十四編	慢脾	一八
第十五編	解顱	一九
第十六編	耳沁	二〇
第十七編	齒語行遲	二一
第十八編	弄舌舒舌	二三
第十九編	項軟	二四
第二十編	五軟五硬	二五
第二十一編	傷風	二七
第二十二編	咳嗽	二八

幼科金鍼目錄

二

第二十三編	肺風痰喘	三〇	第三十七編	夾食夾驚	四八
第二十四編	喘急	三二	第三十八編	汗聚	四九
第二十五編	天哮	三三	第三十九編	傷食	五〇
第二十六編	鼻風	三五	第四十編	傷積	五一
第二十七編	胎怯	三六	第四十一編	食厥	五三
第二十八編	滯頤	三七	第四十二編	腹痛	五五
第二十九編	潮熱	三八	第四十三編	顛陷顛填	五六
第三十編	痰症	三九	第四十四編	風癇	五七
第三十一編	吐瀉	四〇	第四十五編	驚悸	五八
第三十二編	疳氣	四二	第四十六編	五疳	五九
第三十三編	盜汗自汗	四三	第四十七編	丹疹	六一
第三十四編	五淋	四四	第四十八編	水腫	六二
第三十五編	溺血	四五	第四十九編	嘔吐	六三
第三十六編	傷寒	四六	第五十編	脾胃	六六

卷下

第五十一編	心疳	六九
第五十二編	肝疳	七〇
第五十三編	脾疳	七二
第五十四編	肺疳	七三
第五十五編	腎疳	七四
第五十六編	丁奚哺露	七五
第五十七編	雞胸龜背	七六
第五十八編	痧癆	七八
第五十九編	霍亂	八〇
第六十編	中暑	八一
第六十一編	中寒	八二
第六十二編	中惡	八三

第六十三編	瘧疾	八四
第六十四編	痢疾	八五
第六十五編	脫肛	八八
第六十六編	瘡癤	八九
第六十七編	痢後風	九一
第六十八編	休息痢	九一
第六十九編	黃疸	九二
第七十編	積氣	九三
第七十一編	停積	九五
第七十二編	鼻衄	九六
第七十三編	便血	九八
第七十四編	閉結	九九
第七十五編	泄瀉	一〇〇
第七十六編	蚊厥	一〇三

幼 科 金 鍼 目 録

四

第七十七編	溺癰	一〇四	第八十七編	喉痺	一一四
第七十八編	胎內傷	一〇五	第八十八編	鹽哮醋哮	一一六
第七十九編	奶癰	一〇六	第八十九編	疥癩	一一七
第八十編	赤遊丹毒	一〇六	第九十編	葡萄疫	一一七
第八十一編	赤遊癰	一〇八	第九十一編	耳潰	一一八
第八十二編	重舌木舌	一〇九	第九十二編	火燙	一一九
第八十三編	風毒	一一〇	第九十三編	濕痺	一二一
第八十四編	走馬疳	一一一	第九十四編	膿窠疔	一二二
第八十五編	乳蛾	一二二	第九十五編	疔瘡	一二三
第八十六編	螞蟥丹	一二三	第九十六編	反關痘	一二五

幼科金鍼卷上

雲間秦昌遇景明輯

金山吳中俊果超校

第一編 全胎

靈根一縷固元陽

天授神丹非世方

若使真精能返復

終身無疾少瘡瘍

夫人爲三才之首。具有小天地。本厥元始。非是空桑。實由父母精血而成形也。是以先天之氣具足而生者。其子易於長成。如其不足。必至尪羸。或中道夭亡。故受孕之始。必須謹慎胞胎。又爲先天之寶。何則。以其元氣貫足於其中。精血橐籥於其外。嬰兒在腹。咀吮其精神。取資其血乳。實爲結胎成子之器。嬰兒墮地。失其所寶。元氣已離。出頭啼哭。必得使之返復先天。使真元不失。易於生長。

無有諸疾。血氣充滿。痘疹必稀。瘡痍亦鮮。須延生第一丹。

小兒初生。臍帶落後。取置新瓦上。燒烟將盡。放地上。以蓋覆之。存性研末。若臍帶有五分重。配水飛過辰砂研細末二分五厘。生地黃當歸身煎濃汁。調抹兒上脛。及母乳頭上。使藥下盡。次日大便遺下胎毒穢物。是其驗也。可爲不傳之秘。

第二編 胎寒

初產嬰兒甲上青

握拳曲足哭啼驚

面青肢冷如寒戰

速與溫脾必得生

胎寒者。小兒在胎時。因娠母素有火症。過服寒餌。或喜生冷等物。又不能戒口。味。但取一時快意。殊不知遺患內胎者乎。所稟乃感受先天之前。而非後天之召也。故其症面青。晄白。吐沫。轉乳。啼哭驚悸。急用七香散。或以理中湯治之。卽

愈。

七香散

香附 縮砂仁 益智仁 陳皮 蓬朮 丁香 甘松

右藥各等分爲末薑湯調服

理中湯

人參 白朮 乾薑 炙艸

右藥水煎熱服

第三編 臍寒

臍寒者。兒之降生。或遇嚴寒冰雪。或放於冷濕之地良久。或浸於胞水之中。致令入腹。或浴遲而受凍。乃成臍寒也。然雖曰臍寒。實中於腑也。是以腸鳴水瀉。足冷氣逆。大哭不已。須進理中溫胃湯。訶子散治之。

理中溫胃湯

乾薑五分 白芍藥八分 木香五分 元胡索八分 丁香四分

右藥淨水濃煎熱服

訶子散

訶子二兩 丁香一錢 木香四錢 乾薑一兩 肉桂少許

右藥共爲細末砂仁湯調服

第四編 胎熱

胎熱唇焦目閉紅

疳黃鵝口及遊風

小便赤兮大便結

三黃清熱是良工

兒胎中受母流熱之毒。生下三朝旬日之間。目閉面赤。眼胞浮腫。啼叫不已。時復驚煩。遍體壯熱。小便黃赤。若不早治。則成鵝口。重舌。赤紫丹毒。急以三黃散

進一服。再以大連翹飲。母子同服爲當。

三黃散

川黃連 大黃 黃芩

右藥等分共爲細末燈心湯下

大連翹飲

瞿麥 滑石 連翹 牛蒡子 木通 蟬退 防風 車前子 當歸

荊芥 黑山梔 黃芩 赤芍藥 柴胡 甘草 石膏

加淡竹葉數片水煎熱服

第五編 臍風撮口

生下嬰兒臍受風 啼聲短小面通紅

痰涎不受唇收撮 急治還須總付空